



Tancj auguris, Fedora... auguris e graciis...

... par la tô voglade di confuart cuant che o scrivevi cun chê machine mieç tren a vapôr e mieç motopic par registrâ la prime note de contabilitât. I tiei voi a mi devin confuart e coragjo intun ufici indulà che, vuê come vuê, a si fevelarès di “mobbing”, ma tu tu jeris a li par dâmi fuarce e ligrie (cuant che o lavin a bevi il caffè insieme)...

par la tô dolcece intant che tu i davis la tete a Cristiana, fevelantmi cui tiei mots dal miracul de maternitât...

...par lis nestris venturis di “frutatis di confin”, ai passaçs di Sant Andree e Cjase rosse, mete des nestris incursions a proviodi benzine, cjar e spagnolets: e cetant ridi cuant che intun confin nus mandavin indaûr par vie che o vevin masse robe, plui dal permetût, e nô, ligjeris, o passavin trionfantis par chel altri...

... aes nestris confidencis reciprochis, cualchi volte avilidis, altris invece di sbacanâ par dut chel che a ti cumbinavin propit come dôs fantaçutis bintaris...

... aes nestris seradis a teatri, vivudis simpri cul entusiasim par la braûre dai atôrs e des atoris che, a cjâlâju par television no podevin nancje sumiâsi trop brâfs che a jerin, invece stant a li sot dal palc de sene...

... aes tôs telefonadis cuant che tu “percepissis” che il nivel di sopuartazion par une femenute di un pensionât cence padin e un tic masse vivarôs, al va sù sù adalt inte scjale Richter (mica inta che Mercalli, no veh)... ben tu tu sês a li e tu capissis il grât sismic che mi fâs scjassâ e a plancut tu lu fasis diventâ cuiet splanant la robe, gjavant un pôc l'impuartance...

... aes nestris contis di nonis, che o sin, di maris che o sin e o sin stadis, di fantatis ch'ò jerin, di frutis che o forin: a la fin lis nestris storiis nus fasin sintî come dôs sûrs par dut chel che di une al jentre inte infanzie di chê altre.

... graciis, in struc, par la part positive che di te e je inte mê vite e, a la fin, ancjemò auguris fantastiche FEDORA, AMIE al grât plui alt ch'al sedi!

di Barbara Battel

#945